



Na parti ariba di e foto aki nosta hanja "The Twinkling Stars", orguyo di Paradera, cu den e concurso di mihor steelband a termina na di dos lugar, despues di "Antilles Steel Orchestra" di Paul Connor. E foto abau ta muestra nos e revelacion den e carnaval di e anja aki, "The Tropical Harps", un steelband integra pa damas solamente, cu a cosecha aplausonan tremendo di e publico. Tabata prome biaha cu un steelband femenino a tuma parti na un contest. Na final di nan actuacion, e directiva di grupo, sra. Connor, a ricibi un copita for di man di e presidente di e comite central di carnaval.

CONTEST DI STEELBAND & CALYPSO A ATRA E PUBLICO DI MAS GRANDI TE CU AWOR



"The Mighty Poncho" (na robez) cu su "Come Down King Paul" a konkista diahuebes anochi e titulo di "Mr. Calypsonian" den Lago Sport Park dilanti un publico enorme grandi. Na drechi e maestronan di "Antilles Steel Orchestra" cu a termina na prome

lugar di e concurso di steelbands. Director di e steelband aki ta "King Paul (Connor)" di dos na drechi, kende algun hora despues mester a pasa su corona pa "Mr. Poncho" den e concurso pa mihor cantante di calypso.

SAN NICOLAS - Miles di persona, Lago Sport Park tabata completamente yen, a presencia e contest di steelband y calypso cu a ser teni diahuebs anochi como parti di e celebracion di carnaval na Aruba. Tabatin bon musica di steelband y tambe algun cancionnan picante cu a pone e publico aplaudi pa hopi rato. E recaudacion di e anochi tabata net loke e comite central tabatin mester pa por cubri e gastonan halto cu e carnaval di e anja aki ta trece cune. Un suma di cinco cien florin a ser parti na premio riba e anochi aki.

E contest cu tabata anuncia pa cuminsa 7'or a cuminsa net dos hora despues. Di e diezseis bands cu a inscribi solamente seis a presenta. Di un banda esaki tabata bon, ya cu e programa e ora ey lo a termina mas laat ainda.

"Dakota Steelband" a habri e accionnan di anochi despues cu e maestro di ceremonia, John Hart, a saluda e publico y e presidente di e comite central a vene su di tanto discurso di e temporada. E presidente entre otro a pidi un fuerte aplauso pa e steelband hoben cu a pesar di ta existi solamente algun luna, tog tabatin e brio pa competi den e grandinan.

"The Twinkling Stars" di Paradera ta otro band cu ta cau-

sando basta furor e anja aki.

Nan tres interpretacionnan tabata masha bon y nan a mostra un adelanto grandi. Mas laat den anochi e jurado a duna "The Twinkling Stars" e titulo di subcampeon, un decision cu a cai masha na agrado di mayoria di e publico.

Despues a presenta riba escenario e maestronan di "Antilles Steel Orchestra" bau direccion di Raul Connor, kende te na e momento ey ainda tabata carga e titulo di King Paul.

Pa un gran parti di e publico tabata incomprendible ta di con barinan bashi por a trece musica asina bunita.

Sonido y paradanan exacto e

maestronan di e orquesta a aplica den e tres numeronan. Indiscutiblemente Paul Connor y su muchanan ta e campeonnan di e anja aki. Tanto e publico y e jurado a vota unanimamente pa "Antilles Steel Orchestra" hanja e prome lugar. E siguiente steelbands cu a actua tabata "The Tropical Harps, consistiendo di damas solamente, Long Sun Steelband, y "Aruba Invaders", cu anja pasa a termina na promer lugar.

"The Tropical Harps" a demostra cu ya nan ta domina e barrinan caba y cu denter di poco tempo nan por yega na "Beat un of mas di e grandinan".

Pa e concurso di e mihor cantante di calypso a inscribi seis competidor. "Lord Bucksoe", "Young Quick Silver", Ray Anthony Thomas, "The Mighty Poncho", Rowlie Williams y "King" Paul Connor.

Na principio e microfono a stroba e actuacion di e prome cantantenan y a haci cu nan mester a cuminsa nan cancion mas cu un biaha. "Young Quick Silver" a debuta e anochi aki a worde ricibi cu masha aplauso, despues cu e publico a tende su calypsonan y a mira su forma di actua.

Decision di e jurado cu tabata consisti di Edwin Zichem, Arnold Beyde, Padu del Caribe, Rafael Hodge y Jac d'Jon, a indica "The Mighty Poncho" na prome lugar, Raul Connor na di dos y "Young Quick Silver" na di tres

lugar. Despues cu e presidente di e comite central di carnaval a haci entrega di e premionan, Paul Connor a kita su corona y deposit'e riba cabez di "The Mighty Poncho". Na momento cu e programa a termina, ya e oloshi tabata mostra un'or y mei.